

Abstract

Operaziuns dal tscharvè da pazientas e pazients «difficils». La psichirurgia en il chantun Grischun

La leucotomia, in'intervenziun manuala en il tscharvè che chaschuna pitschnas blessuras en la substanza alva da domadus lobuls frontals (Stirnlappen), è vegnida sviluppada il 1935 dal neurolog portugais Egas Moniz. Suenten la Segunda Guerra mundiala è ella era vegnida introducida en la psichiatria svizra. Operaziuns dal tscharvè èn probablmain la metoda la pli ristgada e la pli gravanta da tractar malsaunas da la psica, perquai ch'ellas intervegnan a moda directa ed irreversibla en la personalitad dals pertutgads, modifitgeschan quella e pon era avair grevs effects secundars corporals. Ils psichiaters da lez temp, ch'eran conscients da quai, na crajevan er betg da pudair eliminar cun la nova metoda da tractament il disturbi psychic effectiv. Ma els speravan che l'operaziun mitigeschia sintoms sco acts obsessivs u in cumportament agità ed aggressiv tar pazientas «difficilas», resistentas ad autras metodos. En il chantun Grischun han ins fatg tranter il 1947 ed il 1971 var 100 leucotomias en il spital chantunal a Cuira ed en il spital a Tusaun. Las pazientas ed ils pazients vegnivan da las duas clinicas psichiatricas Waldhaus e Realta. Dals 44 pazients enconuschents cun il num èn 26 dunnas e 18 umens, quai che correspunda ad ina relaziun da schlattaina da circa 3:2. In'analisa da las actas medicalas da questAs pazientAs mussa ch'i na dat betg mo areguard la quantitad, mabain era areguard la qualitad differenzas tranter las schlattainas: tenor las actas paran las pazientas da leucotomia d'avair fatg dapli difficultads en la clinica ch'ils pazients masculins. Quai vala per acts da violenza visavi il personal ed ils auters pazients, ma oravant tut era per l'agitaziun verbala. La gronda part da las pazientas vegn descritta en ils rapports medicals sco «dad aut». Ellas clamavan, sbragivan, saviglavan, planschevan e lamentavan regularmain u permanentmain e disturbavan uschia il manaschi da la clinica.

Era Klara D., l'emprima persuna ch'è vegnida leucotomada en il Grischun, era ina pazienta «difficila». Ella, ch'aveva vivì pli baud cun ses ex-um e ses dus uffants a Cuira, era ospitalisada dapli blers onns pervi da schizofrenia. La pazienta era savens agitada ed aggressiva, chantava adina, refusava mintgatant il da mangiar, stueva savens vegnir isolada e duvrava il davos ina stanza singula. Ins sperava ch'ina leucotomia pudess mitigiar la malruassaivladad e l'agressivitat da la pazienta, quai che fiss stà in grond levgiament betg mo per il personal e las autras pazientas, mabain era per Klara D. sezza.

Sco ch'i para, presupponev'ins sin fundament dals stereotips da las schlattainas che prevalevan da lez temp, che betg mo dunnas saunas, mabain era dunnas malsaunas sajan «ruassaivlas e pulitas». Pazientas ch'eran «dad aut» e violentas, cuntrafascchevan perquai a las spetgas visavi la rolla da las dunnas. Il cumportament aggressiv dals umens dentant chapiv'ins plitost sco part da lur virilitad.